

Suliffeqarfiit namminersortut pitsaasumik, inerititaqarfiusumillu iliuseqartut, avatangiisinut mingutsaaliuinerikkut, nukissiuutit mingutsitsinngitsut atornerisigut, aammalu CO₂-mik aniatitsinerikkut annikillisaasut akissarsisinneqartalernissaannik Naalackersuisut sulissuteqaqqullugit Inatsisartut aalajangiiffigisassaattut siunnersuut. (ATASSUT-ip Inatsisartuni ilaasortaaitai, Siverth K. Heilmann aamma Gerhardt Petersen)

Akissuteqaat

(Ineqarnermut, Pinngortitamut Avatangiisinullu Naalackersuisoq)

Siullermeerneqarnera

Atassutip Inatsisartuni ilaasortaaitai Gerhardt Petersen aamma Siverth K. Heilmann suliffeqarfiit namminersortut pitsaasumik, inerititaqarfiusumillu iliuseqartut, avatangiisinut mingutsaaliuinerikkut, nukissiuutit mingutsitsinngitsut atornerisigut, aammalu CO₂-mik aniatitsinerikkut annikillisaasut akissarsisinneqartalernissaannik Naalackersuisut sulissuteqaqqullugit Inatsisartut aalajangiiffigisassaattut siunnersuummik saqqummiussaqqarput.

Pitsaasumik isumalluutinillu annikitsumik atuineq imminermini sipaagaqarfiusarpoq, taamaalillunilu atuisumut pissarsiaqarfiusarluni. Atuisoq nalinginnaasumik atuisuunersoq, suliffeqarfiunersoq namminersortoq imaluunniit pisortat sullissiviutigineraat apeqqutaatinnagu tamanna pisarpoq.

Ilulissani erngup nukinganik innaallagissiorfiup nutaanerpaap atorneqalerneratigut Kalaallit Nunaanni innaallagissap 70%-ia erngup nukinganit pissarsiarineqartalerpoq. Ilulissat saniatigut Narsaq, Qaqortoq, Nuuk, Sisimiut aamma Tasiilaq erngup nukinganit innaallagissamik pilersorneqarput. Taamaalillunilu aamma illoqarfinni taakkunani suliffeqarfiit pilersorneqarput. Innaallagialu mingutsitsisuunngilaq CO₂-millu aniatitsiviunani.

Kalaallit Nunaat ilaatigut suliffeqarfinnut avatangiisinut mingutsitsinermik annikillisaasunut nersorinnissutaasumik akissarsititsiviusumillu nersornaasiisareerpoq, tassalu Avatangiisinut Pinngortitamullu Nersornaat ukiumut ataasiarluni tunniunneqartartoq.

”Nersornaat inuttut, sullissivinnut aqqissuussaannernulluunniit, maligassiullutik angusaqarusullutillu pinngortitamut avatangiisinullu tamatta

eqqummaarinnerulernissatsinnut, imaluunniit suliatik aqqutigalugit Kalaallit Nunaanni avataangiisinik pitsannguiniarlutik aalajangersimasunik suliniuteqarnermikkut kivitseqataasunut nersorinnissutitut tunniunneqartarpoq.” Ineqarnermut, Pinngortitamut Avatangiisinullu Naalackersuisoqarfik ingerlatsinermi missingersuutini ukiumut 100.000 koruuninik, nersornaaserneqartunut akiliuteqarnermi aningaasartuutitut matussutissanik immikkoortitsisarpoq. Assersuutigalugu Kalaallit Nunaata kujataani Ipiutaq Guest Farm 2012-imi nersornaaserneqarpoq aammalu Hotel Arctic 2011-mi nersornaaserneqarluni.

Aamma Namminersorlutik Oqartussat CSR Greenland-ip suliniutaanut, ”Clean Greenland – Green Companies”-imik taaneqartumut aningaasaqarnikkut tapersiivoq. Suliami suliffeqarfiit suleqataasut qulingiluasut avatangiisinut aqutsisui aammalu avatangiisinut artukkiisut gassillu silaannarmik kissakkiartortitsisartut annikillisinneqarnissaat siunnerfigineqarput.

Tapiissutit VEK-mut Aningaasaliissutit, Nukissiuutit Ataavartut, Nukissiornermik Pitsanngorsaanerit aamma Silap Pissusaa pillugu ineriartortitsinernut tapersiissutaasartut aqqutigalugit tunniunneqartarput.

Tassalu sammivinnit assigiinngitsunit annertuunik iliuuseqartoqartareerpoq. Aamma Kalaallit Nunaanni Sulisitsisut Peqatigiiffiata CSR Greenlandimut suleqataanermigut avatangiisinut tunngasunik suliaqarnerani, avatangiisinut, isumalluutitut nukissiuuteqarnermullu pitsaasumik iliuuseqartarnissaq suliffeqarfiit namminneerlutik soqutigisarigaat pillugu oqaaseqaat aallarniutaasoq erseqqissarneqarpoq.

Matuma siuliani oqaatigineqartut tunngavigalugit aalajangiiffigisassatut siunnersuutip itigartinneqarnissaa Naalakkersuisut inassutigaat.